

COLUMNA

Vegnir pli vegl

DAVID SPINNLER

Tgi sa tge che quel scri-va questa giada puspè davart corona? Nagut – quai hai jau gea empermess la davosa giada.

Jau hai gist udì in song en il radio – your song saved my life – tia chanzun m'ha salvà la vita. La vusch mega enconuschenta, dentant: Tgi è quai? Bono? Quel ha bain ina vusch pli fermenta, pli rauca – quai è bain in da «mes» rockstars? Era in da mes rockstars?

Igl è propi Bono – la nova single da U2. Il song pudess esser dad *Elton John*, la vusch da Bono è fitg loma e bler pli calma che quella giada, durant ils temps da «Joshua Tree» ubain da «The unforgettable fire». Quest song da U2 dal 2021 ad in open air? Lura stuess il public esser 50+ e quai fiss la chanzun da buna notg a las 23.00, cura che tuts van brav a durmir en il camper climatissà. Bono po festivar ils 10 da matg 2022 ses 62avel anniversari.

Büne Huber da Patent Ochsner – ils 27 favrer 2022 60 onns. *Kuno Lauener* da Züri West – ha festiva ils 17 mars 2021 ses sesantavel. *Eddie Vedder* da Pearl Jam – ok, quel festive-



scha ils 23 december pir il 57avel, quai va gea anc. *Gianna Nannini* – la rocktröra taliana va vers ils 70. Da *Mick Jagger* dals Stones en etern na pon ins quasi betg discurren – dal 2023 ha el 80 onns ed el aveva gia passà ils 40 cura che jau era anc in giuvenot.

S to ina rockstar esser giuvna? Po ina rockstar daventar veglia e restar rockstar?

P er mai schon. In *Zucchero* cun ses 66 onns po tschiffar mai cun tuns fins e melodias per l'eternitad. E natiralmain *Campino*. Era el vegn l'onn proxim 60. Ma quel um po far tge ch'el vul. Giuven e vegl flippa ora cumplettamain. Forsa perquai ch'el creescha muments infintis («Das hier ist ewig – ewig für heute!»)

– cun ina persvasiun ed in entusiassem incredibel.

I na persuna giuvna vesa quai forsa auter. Ma jau aud adina dapli musicistas giuvnas che daventan stars per mai gist perquai ch'ellas laschan sentir entusiassem e profunditad. Forsa anc betg cun l'experientscha da vida dad ina rockstar vegl, dentant cun lur perspectiva giuvna e frestga. Cler che quest è ussa puspè la perspectiva dad ina persuna pli veglia cun passa 50 onns.

Jau ma regord dentant vi da mia perspectiva anc magari giuvna – vi dals ultims onns da vita da Johnny Cash. Per mai era el quella giada, durant ils onns 90, in rockstar absolut. Johnny Cash cun sia vusch madira, per mia uida adina pli bassa. Johnny Cash che ha registrà cun passa 60 onns ils albums American Recordings, realisads cun Rick Rubin, producent da bands da quella giada anc giuvnas. Musica minimala, simplamain la vusch megagalactica da Johnny Cash. Quella giada per mai sco uman anc giuven in star absolut en sia vegliadetgna.

David Spinnler da Sta. Maria è mainagestiu dal Parc da natüra Biosfera Val Müstair.